

ՔՆՆԱՐԿՎԵԼ Է ԱՆՎՃԱՐ ԻՐԱՎԱԿԱՆ ՕԳՆՈՒՅՑՈՒՆ ՏՐԱՄԱԴՐԵԼՈՒ ՄԻԱՑՅԱԼ ՆԱՀԱՆԳՆԵՐԻ ՓՈՐՁԸ

02.05.2017 16:46



Հայաստանի Հանրապետության փաստաբանների պալատի նախագահ Արա Զոհրաբյանն ընդունել է Վաշինգտոնի Legal Aid Society կազմակերպության իրավաբանական տնօրեն Չին Լինին:

Հանդիպմանը հյուրի խնդրանքով Պալատի նախագահը ներկայացրել է Հայաստանում անվճար իրավաբանական օգնություն տրամադրելու օրենսդրությանը և գործող պրակտիկային առնչվող մանրամասներ:

Անդրադառնալով իր կազմակերպությանը՝ Չին Լին նշել է դրաստեղծման նպատակները, քաղաքացիական գործերով Pro Bono (կամավոր անվճար) ծառայություններ մատուցելու ձևավորված ավանդույթները և փաստաբանական գրասենյակների հետ համագործակցության եղանակները: Ներկայացնելով նահանգային և դաշնային մակարդակներում իրավական անվճար օգնության առանձնահատկություններն ու տարբերությունները՝ Չին Լին անդրադարձել է բոլոր համակարգերին հատուկ օրինաչափություններին՝ նշելով, որ կամավորության սկզբունքով իրավական ծառայություններ մատուցելը փոխշահավետ է փաստաբանական գրասենյակների, անհատ փաստաբանների և այդ հարցերով զբաղվող հասարակական կազմակերպությունների համար: Նա տեղեկացրել է, որ Pro Bono ծառայություններ մատուցած և դրանք ֆինանսավորած փաստաբաններն ու փաստաբանական գրասենյակները հաշվետու են Ամերիկայի փաստաբանների միությանը և տարեկան կտրվածքով այս ուղղությամբ տարվող իրենց աշխատանքների, ժամերի քանակի վերաբերյալ տեղեկություններ են տրամադրում Ամերիկայի փաստաբանների միությանը: Հետագայում փաստաբանների աշխատանքը սանդղակավորվում և զետեղվում է Ամերիկայի փաստաբանների միության պաշտոնական կայքում:

Պատասխանելով մեր երկրի փաստաբանության ոլորտին առնչվող հարցերին՝ Արա Զոհրաբյանը տեղեկացրել է, որ ՀՀ ազգային ժողովում է գտնվում «Փաստաբանության մասին» ՀՀ օրենքի նախագիծը, որում լրամշակված և բարեփոխված են անվճար իրավական օգնության տրամադրմանն առնչվող դրույթները: Նա նշել է, որ նախագծում ներառվել են Հանրային պաշտպանի գրասենյակին զուգահեռ անվճար իրավական օգնության նոր մեխանիզմներ, որոնց կյանքի կոչելու դեպքում փաստաբաններին կամավոր անվճար իրավական օգնության մղելու հիմքեր են նախանշվելու:

Հանդիպմանը քննարկվել են նաև Միացյալ Նահանգներում հանրային պաշտպանների ծանրաբեռնվածությանը, տարեկան գործերի քանակին, որակի չափելիությանն առնչվող հարցեր:

Չին Լին հանդիպել է նաև Փաստաբանական դպրոցի տնօրենին և Հանրային պաշտպանի գրասենյակի ղեկավար կազմին:

Վերադառնալ `$(window).load(function(){ if(typeof $(".fb_comments_count").html() != "undefined" && parseInt($(".fb_comments_count").html()) != 0){ updateCommentsCount(window.location.href); } }`